

Minister Otmar Oduber a entrega reconocimiento na 7 baluarte di nos Carnaval

Durante Carubbian Festival



DIAHUEBS anochi durante Carubbian Festival a tuma luga un homenahe sumamente special. Ta trata aki di 7 baluartenan di Carnaval cu a wordo honra pa nan participacion grandisimo den nos Carnaval. Minister Otmar Oduber, kende tambe ta un Carnavalista di curason tabatin e honor di entrega e reconocimiento aki, den forma di e edicion 14 di Bacchanal na e 7 leyendanan di nos Carnaval, mirando cu como reconocimiento na nan contribucion, nan ta aparece riba e front di e revista oficial di Aruba su Carnaval. Ta trata aki di Nico Quant, Mary Simon, Eddy Ras,

Martica Arends, Bertha Janga, Sela Goeloe y Tutu Rasmijn.

Mester bisa cu tur e 7 baluartenan aki ta personanan cu ta biba pariba di brug y pa tal motibo tambe a scoge pa reconocenan durante Carubbian Festival.

Minister Otmar Oduber tabatin palabranan hopi bunita den direccion di tur 7, caminda el a gradicinan pa contribui na engrandece e fiesta di nos pueblo. "Ta danki na personanan manera bosonan cu nos Carnaval ta un di e eventonan di mas importante di nos isla, ta boso trabounan bunita a

haci di nos Carnaval loke e ta awendia".

Chibi van der Hans, e persona tras di Bacchanal a haci entrega tambe di un reconocimiento na Minister Otmar Oduber, pa su contribucion na nos Carnaval. Un cantidad di hende grandi tabata presente na durante e momento aki y nan tur a sa di comparti e alegria di esnan homenagea y sigur a muestra nan sosten pa e reconocimiento aki, cual sigur ta bon mereci. Minister Oduber ta spera di por sigui conta cu e sosten di cada un di nan, y di hopi otro persona pa sigui engrandece nos dushi Carnaval.